

**Ataatsimiinnerup ammarneqarnera**

(Inatsisartut Siulittaasuut)

Inatsisartut 2015-imi upernaakkut ataatsimiinnerat maanna ammarneqarpoq.

Nuannaarutigeqaara Inatsisartunut ilaasortaqaatika qinikkat upernaakkut ataatsimiinnermut matumunnga ullumi maanga ataatsimiittarfitsinnut tikilluaqqusinnaagakkit. Ataatsimiinnermi oqaluuserisassat pingaarutillit oqaluuserisussaavagut, neriutigaaralu suleqatigiilluarnitsigut angusaqarfiulluarmik oqaluuseriumaarivut.

Naalackersuisut inatsisiliortullu suleqatigiilluarnissaannik kissaateqarlunga taamatuttaaq Naalackersuisunut ilaasortat qamanna pisumik tikilluaquakka.

Taamatuttaaq nuannaarutigaara Inatsisartut Ombudsmandiat kiisalu Naalagaaffiup Sinnisaa tikilluaqqusinnaagakkit.

Taamatullu aamma tusagassiortut ataatsimiinnermik malinnaasut, kiisalu minnerunngitsumillu innuttaasut tusarnaartut, tikilluaquakka.

Nunatsinni tamarmi nunaqqativut tamaasa radiukkut, isiginnaarutikkut inatsisartullu nittartagaatigut Inatsisartut ataatsimiinnerannik malinnaasinnaasut pinngitsoorusunngilanga aamma tikilluaqqussallugit.

Ilisimatitsissutigissavara Inatsisartunut Naalackersuisunullu ilaasortat tamarluinnangajammik ataatsimiinnerup ammarneqarnerani najuummata. Inatsisartunut ilaasortaq Mimi Karlsen najuussinnaangikkallarpoq marsip qaammataata naanissaanut sulinnigiffeqarnissaa Siulittaasoqarfimmit akuerineqarsimammat.

Mimi Karlsenip peqannginnerani Múte Bourup Egede sinnisussatut ataatsimiigiquneqarsimavoq. Qinigaanerup Misilinneqarnissaanut Ataatsimiititaliap Múte Bourup Egedep Inatsisartunut qinigaasinnaanera inassutigaa. Tamanna akerlerineqarnerluni? [Uninngalaarneq]. Taamaattoqanngilaq. Taamaallilunga aamma Múte Bourup Egede maanga tikilluaqqusinnaavara inissaminullu ingeqqullugu.

Naggasiutigalugu ilisimatitsissutigissavara januaarip qaammataata naalernerani Siulittaasoqarfik isumasioqatigiimmat Inatsisartut Suleriaasiat malittarisassallu allat Inatsisartut sulineranni najoqqutarineqartut misissuataarlugit. Isumasioqatigiinneq taanna tunngavigalugu ataatsimiinnermut matumunnga inatsisartuni sulinermut killiliussat pitsanngorsarneqarnissaanut siunnersuutinik assigiinngitsunik Siulittaasoqarfik siunnersuuteqarpoq.

Upernaakkut ataatsimiinneq aallartittoq qinigaaffimmi matumani ileqquusumik katersuunnitta siullersaraat. Inatsisartut Siulittaasuattut piffissaq manna atorusuppara tamatsinnut eqqaasitsissutigissallugu qinigaaffimmi aggersumi aalajangiinissarpasuit ilungersunarsinnaasut piumasarimmassuk tamatta tunniusimalluta ilumoorlutalu sulinissarput. Inatsisartuni suleqatigiinnerunissaq tamatta kissaatigisarput immini angakkuakkatut takkunnavianngilaq. Tamanna aatsaat piviusunngorsinnaavoq immitsinnut tusarnaarnerulerutta isummavullu assigiinngissinnaasut imminnut qanillattortillugit, nunatsinnut innuttaasunullu tamanut iluaqutaasumik.

Taamatut oqaaseqarlunga najuuttut tikilluaqqoqqippakka. Neriuppunga ataatsimiinnivut pitsaasumik inerititaqarfiusumillu ingerlakkumaarivut, ataatsimiinnermilu anguniakkavut angujumaarivut.

Taamatut oqaaseqareerama oqaluuserisassani immikkoortup tullianut ingerlaqqissinnaavugut.